

四庫全書

史部

欽定四庫全書

舊唐書卷一百九十四下

後晉司空同中書門下平章事劉 昫撰

列傳第一百四十四下

突厥下

西突厥本與北突厥同祖初木杆與沙鉢略可汗有隙因分為二其國即烏孫之故地東至突厥國西至雷鵠海南至疎勒北至瀚海在長安北七千里自焉耆國西

北七日行至其南庭又正北八日行至其北庭鐵勒龜
茲及西域諸胡國皆歸附之其人雜有都陸及弩失畢
歌邏祿處月處密伊吾等諸種風俗大抵與突厥同唯
言語微差其官有葉護有特勒常以可汗子弟及宗族
為之又有乙斤屈利啜閭洪達頡利發吐屯俟斤等官
皆代襲其位

處羅可汗隋煬帝大業中與其弟闕達設及特勒大奈
入朝仍從煬帝征高麗賜號為曷薩那可汗遇江都之

亂從宇文化及至河北化及敗歸長安高祖為之降榻
引與同坐封歸義郡王獻大珠於高祖高祖勞之曰珠
信為寶朕所重者赤心珠無所用竟不受之先與始畢
有隙及在京師始畢遣使請殺之高祖不許羣臣諫曰
今若不與則是存一人而失一國也後必為患太宗曰
人窮來歸我殺之不義驟諫於高祖由是遲迴者久之
不得已乃引曷薩那於內殿與之縱酒既而送至中書
省縱北突厥使殺之太宗即位令以禮改葬闕達設初

居於會寧有部落三千餘騎至隋末自稱闕達可汗武德初遣使內屬拜吐烏過拔闕可汗厚加撫慰尋為李軌所滅特勒大奈隋大業中與曷薩那可汗同歸中國及從煬帝討遼東以功授金紫光祿大夫後分其部落於樓煩會高祖舉兵大奈率其衆以從隋將桑顯和襲義軍於飲馬泉諸軍多已奔退大奈將數百騎出顯和後掩其不備擊大破之諸軍復振拜光祿大夫及平京城以力戰功賞物五千段賜姓史氏武德初從太宗破

薛舉又從平王世充破竇建德劉黑闥並有殊功賜宮女三人雜綵萬餘段貞觀三年累遷右武衛大將軍檢校豐州都督封竇國公實封三百戶十二年卒贈輔國大將軍初曷薩那之朝隋也為煬帝所拘其國人遂立薩那之叔父曰射匱可汗

射匱可汗者達頭可汗之孫也既立後始開土宇東至金山西至海自玉門已西諸國皆役屬之遂與北突厥為敵乃建庭於龜茲北三彌山尋卒弟統葉護可汗代

立

統葉護可汗勇而有謀善攻戰遂北并鐵勒西拒波斯
南接罽賓悉歸之控弦數十萬霸有西域據舊烏孫之
地又移庭於石國北之千泉其西域諸國王悉授頡利
發并遣吐屯一人監統之督其征賦西戎之盛未之有
也武德三年遣使貢條支巨卵時北突厥作患高祖恩
加撫結與之并力以圖北蕃統葉護許以五年冬大軍
將發頡利可汗聞之大懼復與統葉護通和無相征伐

統葉護尋遣使來請婚高祖謂侍臣曰西突厥去我懸
遠急疾不相得力今請婚其計安在封德彝對曰當今
之務莫若遠交而近攻正可權許其婚以威北狄待數
年後中國盛全徐思其宜高祖遂許之婚令高平王道
立至其國統葉護大悅遇頡利可汗頻歲入寇西蕃路
梗由是未果為婚貞觀元年遣真珠統俟斤與高平王
道立來獻萬釘寶鈿金帶馬五千疋時統葉護自負強
盛無恩於國部衆咸怨歌邏祿種多叛之頡利可汗不

悅中國與之和親數遣兵入寇又遣人謂統葉護曰汝若迎唐家公主要須經我國中而過統葉護患之未克婚為其伯父所殺而自立是為莫賀咄侯屈利俟毗可汗太宗聞統葉護之死甚悼之遣齋玉帛至其死所祭而焚之會其國亂不果至而止

莫賀咄侯屈利俟毗可汗先分統突厥種類為小可汗及此自稱大可汗國人不附弩失畢部共推泥孰莫賀設為可汗泥孰不從時統葉護之子啞力特勒避莫賀

咄之難亡在康居泥孰遂迎而立之是為乙毘鉢羅肆
葉護可汗連兵不息俱遣使來朝各請婚於我太宗答
之曰汝國擾亂君臣未定戰爭不息何得言婚竟不許
仍諷令各保所部無相征伐其西域諸國及鐵勒先役
屬於西突厥者悉叛之國內虛耗肆葉護既是舊主之
子為衆心所歸其西面都陸可汗及莫賀咄可汗部豪
帥多來附之又興兵以擊莫賀咄大敗之莫賀咄遁於
金山尋為咄陸可汗所害國人乃奉肆葉護為大可汗

肆葉護可汗立太發兵北征鐵勒薛延陀逆擊之反為
所敗肆葉護性猜狠信讒無統馭之畧有乙利可汗者
於肆葉護功最多由是授小可汗以非罪族滅之羣下
震駭莫能自固肆葉護素憚泥孰而陰欲圖之泥孰遂
適焉耆其後没卑達干與突厥弩失畢二部豪帥潛謀
擊之肆葉護以輕騎遁於康居尋卒國人迎泥孰於焉
耆而立之是為咄陸可汗

咄陸可汗泥孰者亦稱大渡可汗父莫賀設本隸統葉

護武德中嘗至京師時太宗居藩務加懷輯與之結盟
為兄弟既被推為可汗遣使詣闕請降太宗遣使賜以
名號及鼓纛貞觀七年遣鴻臚少卿劉善因至其國冊
授為吞阿婁拔奚利邲咄陸可汗明年泥孰卒其弟同
娥設立是為沙鉢羅啞利失可汗

沙鉢羅啞利失可汗以貞觀九年上表請婚獻馬五百
疋朝廷唯厚加撫慰未許其婚俄而其國分為十部每
部令一人統之號為十設每設賜以一箭故稱十箭焉

又分十箭為左右廂一廂各置五箭其左廂號五咄六部落置五大啜一啜管一箭其右廂號為五弩失畢置五大俟斤一俟斤管一箭都號為十箭其後或稱一箭為一部落大箭頭為大首領五咄六部落居於碎葉已東五弩失畢部落居於碎葉已西自是都號為十姓部落啞利失既不為衆所歸部衆携貳為其統吐屯所襲麾下亡散啞利失以左右百餘騎拒之戰數合統吐屯不利而去啞利失奔其弟步利設與保焉耆其阿悉吉

闕俟斤與統吐屯等召國人將立欲谷設為大可汗以
啞利失為小可汗統吐屯為人所殺欲谷設兵又為其
俟斤所破啞利失復得舊地弩失畢處密等並歸啞利
失十二年西部竟立欲谷設為乙昆咄陸可汗乙昆咄
陸可汗既立與啞利失大戰兩軍多死各引去因與啞
利失中分自伊列河已西屬咄陸已東屬啞利失咄陸
可汗又建庭於鐵曷山西謂為北庭自厥後失拔悉彌
駁馬結骨火燭觸水昆諸國皆臣之十三年啞利失為

其吐屯俟利發與欲谷設通謀作難唃利失窮蹙奔拔汗那而死弩失畢部落酋帥迎唃利失弟伽那之子薄布特勒而立之是為乙毘沙鉢羅葉護可汗

乙毘沙鉢羅葉護可汗既立建庭於睢合水北謂之南庭東以伊列河為界自龜茲鄯善且末吐火羅焉耆石國史國何國穆國康國皆受其節度累遣使朝貢太宗降璽書慰勉貞觀十五年令左領軍將軍張大師往授焉賜以鼓纛于時咄陸可汗與葉護頻相攻擊會咄陸

遣使詣闕太宗諭以敦睦之道咄陸于時兵衆漸強西域諸國復來歸附未幾咄陸遣石國吐屯攻葉護擒之送於咄陸尋為所殺咄陸可汗既并其國弩失畢諸姓心不服咄陸皆叛之咄陸復率兵擊吐火羅破之自恃其強專擅西域遣兵寇伊州安西都護郭恪率輕騎二千自烏骨邀擊敗之咄陸又遣處月處密等圍天山縣郭恪又擊走之恪乘勝進拔處月俟斤所居之城追奔及於遏索山斬首千餘級降其處密之衆而歸咄陸初

以泥孰啜自擅取所部物斬之以徇尋為泥孰啜部將胡祿居所襲衆多亡逸其國大亂貞觀十五年部下屋利啜等謀欲廢咄陸各遣使詣闕請立可汗太宗遣使齎書立莫賀咄乙毘可汗之子是為乙毘射匱可汗乙毘射匱可汗立乃發弩失畢兵就白水擊咄陸自知不為衆所附乃西走吐火羅國中國使人先為咄陸所拘者射匱悉以禮資送歸長安復遣使貢方物請賜婚太宗許之詔令割龜茲于闐疎勒朱俱波葱嶺等五國

為聘禮及太宗崩賀魯反叛射匱部落為其所併

阿史那賀魯者曳步利設射匱特勒之子也初阿史那步真既來歸國咄陸可汗乃立賀魯為葉護以繼步真居於多邏斯川在西州直北一千五百里統處密處月姑蘇歌邏祿弩失畢五姓之衆其後咄陸西走吐火羅國射匱可汗遣兵迫逐賀魯不常厥居貞觀二十二年乃率其部落內屬詔居延州尋授左驍衛將軍瑤池都督高宗即位進拜左驍衛大將軍瑤池都督如故永徽

二年與其子咥運率衆西遁據咄陸可汗之地總有西域諸郡建牙于雙河及千泉自號沙鉢羅可汗統攝咄陸弩失畢十姓其咄陸有五啜一曰處木昆律啜二曰胡祿居闕啜賀魯以女妻之三曰攝舍提啜啜四曰突騎施賀邏施啜五曰鼠尼施處半啜弩失畢有五俟斤一曰阿悉結闕俟斤最為強盛二曰哥舒闕俟斤三曰拔塞幹啜沙鉢俟斤四曰阿悉結泥孰俟斤五曰哥舒處半俟斤各有所部勝兵數十萬竝羈屬賀魯西域諸

國亦多附隸焉賀魯尋立咥運為莫賀咄葉護數侵擾西蕃諸部又進寇廷州三年詔遣左武衛大將軍梁建方右驍衛大將軍契苾何力率燕然都護所部迴紇兵五萬騎討之前後斬首五千級虜渠帥六十餘人四年咄陸可汗死其子真珠護與五弩失畢請擊賀魯破其牙帳斬首千餘級顯慶二年遣右屯衛將軍蘇定方燕然都護任雅相副都護蕭嗣業左驍衛大將軍瀚海都督迴紇婆閏等率師討擊仍使右武衛大將軍阿史那

彌射左屯衛大將軍阿史那步真為安撫大使定方行至曳咥河西賀魯率胡祿居闕啜等二萬餘騎列陣而待定方率副總管任雅相等與之交戰賊衆大敗斬大首領都搭達干等二百餘人賀魯及闕啜輕騎奔竄渡伊麗河兵馬溺死者甚衆嗣業至千泉賀魯下牙之處彌射進軍至伊麗水處月處密等部各率衆來降彌射又進次雙河賀魯先使步失達干鳩集散卒據柵拒戰彌射步真攻之大潰又與蘇定方攻賀魯於碎葉水大

破之賀魯與啞運欲投鼠耨設至石國之蘇咄城傍人馬飢乏城主伊湟達干許將酒食出迎賀魯信其言入城遂被拘執蕭嗣業旣至石國鼠耨設乃以賀魯屬之賀魯謂嗣業曰我破亡虜耳先帝厚我而我背之今日之敗天怒我也舊聞漢法殺人皆於都市至京殺我請向昭陵使得謝罪於先帝是本願也高宗聞而愍之及俘賀魯至京師令獻於昭陵及太廟詔特免死分其種落置崑陵濛池二都護府其所役屬諸國皆分置州府

西盡于波斯竝隸安西都護府四年賀魯卒詔葬于頡利墓側刻石以紀其事

阿史那彌射者室點密可汗五代孫也初室點密從單于統領十大首領有兵十萬衆往平西域諸胡國自為可汗號十姓部落世統其衆在本蕃為莫賀咄葉護貞觀六年詔遣鴻臚少卿劉善因就蕃立為奚利邲咄陸可汗賜以鼓纛綵帛萬段其族兄步真欲自立為可汗遂謀殺彌射弟姪二十餘人彌射旣與步真有隙以貞

觀十三年率所部處月處密部落入朝授右監門大將軍其後步真遂自立為咄陸葉護其部落多不服委之遯去步真復携家屬入朝授左屯衛大將軍彌射後從太宗征高麗有功封平襄縣伯顯慶二年轉右武衛大將軍及討平賀魯乃冊立彌射為興昔亡可汗兼右衛大將軍崑陵都護分押賀魯下五咄六部落步真授繼往絕可汗兼右衛大將軍濛池都護仍分押五弩失畢部落因下詔曰自西藩罹亂三十餘年比者賀魯猖狂

百姓重被劫掠朕君臨四海情均養育不可使凶狡之
虜恣行侵漁無辜之眚久遭塗炭故遣右屯衛將軍蘇
定方等統率騎勇北路討逐卿等宣暢朝風南道撫育
遂使凶渠畏威夷人慕德伐叛柔服西域總平賀魯父
子既已擒獲諸頭部落須有統領卿早歸闕庭久叅宿
衛深感恩義甚知法式所以冊立卿等各為一部可汗
但諸姓從賀魯非其本情卿等纔至即降亦是赤心向
國卿宜與盧承慶等準其部落大小位望高下節級授

刺史以下官龍朔中又令彌射步真率所部從颶海道
大總管蘇海政討龜茲步真嘗欲并彌射部落遂密告
海政云彌射欲謀反請以計誅之時海政兵纔數千懸
師在彌射境內遂集軍吏而謀曰彌射欲反我輩即無
噍類今宜先舉事則可克捷乃偽稱有勅令大總管齎
物數百萬段分賜可汗及諸首領由是彌射率其麾下
隨例請物海政盡收斬之其後西蕃盛言彌射非反為
步真所誣而海政不能審察濫行誅戮則天臨朝十姓

無主數年部落多散失垂拱初遂擢授彌射子左豹韜衛翊府中郎將元慶為左玉鈐衛將軍兼崑陵都護令襲興昔亡可汗押五咄六部落步真子斛瑟羅為右玉鈐衛將軍兼濛池都護押五弩失畢部落尋進授元慶左衛大將軍如意元年為來俊臣誣謀反被害其子獻配流崖州長安三年召還累授右驍衛大將軍襲父興昔亡可汗充安撫招慰十姓大使獻本藩漸為默啜及烏質勒所侵遂不敢還國開元中累遷右金吾大將軍

卒于長安

阿史那步真者在本蕃授左屯衛大將軍與彌射討平
賀魯加授驃騎大將軍行右衛大將軍濛池都護繼往
絕可汗押五弩失畢部落尋卒其子斛瑟羅本蕃為步
利設垂拱初授右玉鈐衛將軍兼濛池都護襲繼往絕
可汗押五弩失畢部落天授元年拜左衛大將軍改封
竭忠事主可汗仍賜濛池都護尋卒子懷道神龍年累
授右屯衛大將軍光祿卿轉太僕卿兼濛池都護十姓

可汗自垂拱已後十姓部落頻被突厥默啜侵掠死散殆盡及隨斛瑟羅纔六七萬人徙居內地西突厥阿史那氏於是遂絕

突騎施烏質勒者西突厥之別種也初隸在斛瑟羅下號為莫賀達干後以斛瑟羅用刑嚴酷衆皆畏之尤能撫恤其部落由是為遠近諸胡所歸附其下置都督二十員各統兵七千人嘗屯聚碎葉西北界後漸攻陷碎葉徙其牙帳居之東北與突厥為鄰西南與諸胡相接

東南至西廷州斛瑟羅以部衆削弱自則天時入朝不敢還蕃其地竝為烏質勒所併景龍二年詔封為西河郡王令攝御史大夫解琬就加冊立未至烏質勒卒其長子娑葛代統其衆詔便立娑葛為金河郡王仍賜以宮女四人初娑葛代父統兵烏質勒下部將闕啜忠節甚忌之以兵部尚書宗楚客當朝任勢密遣使齎金七百兩以賂楚客請停娑葛統兵楚客乃遣御史中丞馮嘉賓充使至其境陰與忠節籌其事并自致書以申意

在路為娑葛遊兵所獲遂斬嘉賓仍進兵攻陷火燒等城遣使上表以索楚客頭景龍三年娑葛弟遮弩恨所分部落少於其兄遂叛入突厥請為鄉導以討娑葛默啜乃留遮弩遣兵二萬人與其左右來討娑葛擒之而還默啜顧謂遮弩曰汝於兄弟尚不和協豈能盡心於我遂與娑葛俱殺之默啜兵還娑葛下部將蘇祿鳩集餘衆自立為可汗

蘇祿者突騎施別種也頗善綏撫十姓部落漸歸附之

衆二十萬遂雄西域之地尋遣使來朝開元三年制授
蘇祿為左羽林軍大將軍金方道經畧大使進為特勒
遣侍御史解忠順齎書冊立為忠順可汗自是每年
遣使朝獻上乃立史懷道女為金河公主以妻之時杜
暹為安西都護公主遣牙官齎馬千疋詣安西互市使
者宣公主教與暹暹怒曰阿史那氏女豈合宣教與吾
節度耶杖其使者留而不遣其馬經雪寒死並盡蘇祿
大怒發兵分寇四鎮會杜暹入知政事趙頤貞代為安

西都護城守久之由是四鎮貯積及人畜並為蘇祿所掠安西僅全蘇祿既聞杜暹入相稍引退俄又遣使入朝獻方物十八年蘇祿使至京師玄宗御丹鳳樓設宴突厥先遣使入朝是日亦來預宴與蘇祿使爭長突厥使曰突騎施國小本是突厥之臣不宜居上蘇祿使曰今日此宴乃為我設不合居下於是中書門下及百寮議遂於東西幕下兩處分坐突厥使在東突騎使在西宴訖厚賚而遣之蘇祿性尤清儉每戰伐有所克獲盡

分與將士及諸部落其下愛之甚為其用潛又遣使南
通吐蕃附突厥突厥及吐蕃亦嫁女與蘇祿既以三國
女為可敦又分立數子為葉護費用漸廣先既不為積
貯晚年抄掠所得者留不分之又因風病一手攣縮其
下諸部心始携貳有大首領莫賀達干都摩度兩部落
最為強盛百姓又分為黃姓黑姓兩種互相猜阻二十
六年夏莫賀達干勒兵夜攻蘇祿殺之都摩度初與莫
賀達干連謀俄又相背立蘇祿之子咄火仙為可汗以

輯其餘衆與莫賀達干自相攻擊莫賀達干遣使告安
西都護蓋嘉運嘉運率兵討之大敗都摩度之衆臨陣
擒咄火仙并收得金河公主而還又欲立史懷道之子
昕為可汗以鎮撫之莫賀達干不肯曰討平蘇祿本是
我之元謀若立史昕為主則國家何以酬賞於我乃不
立史昕便令莫賀達干統衆二十七年二月嘉運率將
士詣闕獻俘玄宗御花萼樓以宴之仍令將吐火仙獻
于太廟俄又黃姓黑姓自相屠殺各遣使降附

史臣曰中原多事外國窺邊周獫狁漢匈奴之後其類實繁前史論之備矣突厥自隋文修王道肅軍容示恩威以羈縻之煬帝失政教生戎心肇亂離以啓發之高祖借其力而入平京師羣賊附其強而迭據河朔高祖同御榻以延其使太宗幸便橋以約其和當其時焉不其盛矣竟滅其族而身死於國者何也咸謂太宗有馭夷狄之道李勣著戡定之功殊不知突厥之始也賞罰明而將士戮力遇煬帝之亂亡命蓄怒者既附之其興

也宜哉頡利之衰也兄弟構隙而部族離心當太宗之
理謀臣猛將討逐之其亡也宜哉洎武后亂朝默啜犯
塞玄宗纂嗣傳首京師東封太山西戎扈蹕開元之代
繼踵來降西突厥諸族遇其理則衆心悅附而甲兵興
焉遇其亂則族類怨怒而本根破矣理亂二道華夷一
途或贊言於盛衰倚伏未為確論

贊曰中國失政邊夷幸災理亂之道取鑒將來

舊唐書卷一百九十四下

舊唐書卷一百九十四下考證

西突厥傳木杆與沙鉢畧可汗有隙○

臣酉

按新書木

杆舍其子大邏便而立弟佗鉢可汗佗鉢死子菴羅
立菴羅後讓木杆兄子攝國是為沙鉢畧可汗而大
邏便別為阿波可汗自臣所部沙鉢畧襲擊之殺其
母阿波西走達頭則與沙鉢畧有隙者乃木杆之子
大邏便也此當誤

令左領軍左右將軍○左右二字衍從新書刪

舊唐書卷一百九十四下考證

欽定四庫全書

史部

舊唐書卷一百九十五至
六下

詳校官編修臣曹城

洗馬臣王坦修覆勘

覆校官主事臣李駿

校對官中書臣王友亮

謄錄監生臣雷永清

錄定四庫全書

舊唐書卷一百九十五

後晉司空同中書門下平章事劉昫撰

列傳第一百四十五

迴紇

迴紇其先匈奴之裔也在後魏時號鐵勒部落其象微
小其俗驍強依託高車臣屬突厥近謂之特勒無君長
居無恒所隨水草流移人性凶忍善騎射貪婪尤甚以

寇抄為生自突厥有國東西征討皆資其用以制北荒
隋開皇末晉王廣北征突厥大破步迦可汗特勒於是
分散大業元年突厥處羅可汗擊特勒諸部厚斂其物
又猜忌薛延陀恐為變遂集其渠帥數百人盡誅之特
勒由是叛特勒始有僕骨同羅迴紇拔野古覆羅步號
俟斤後稱迴紇焉在薛延陀北境居娑陵水側去長安
六千九百里隨逐水草勝兵五萬人口十萬人初有特
健俟斤死有子曰菩薩部落以為賢而立之貞觀初菩

薩與薛延陀侵突厥北邊突厥頡利可汗遣子欲谷設率十萬騎討之菩薩領騎五千與戰破之於馬鬣山因逐北至於天山又進擊大破之俘其部衆廻紇由是大振因率其衆附于薛延陀號菩薩為活頡利發仍遣使朝貢菩薩勁勇有膽氣善籌策每對敵臨陣必身先士卒以少制衆常以戰陣射獵為務其母烏羅渾主知爭訟之事平反嚴明部內齊肅廻紇之盛由菩薩之興焉貞觀中擒降突厥頡利等可汗之後北虜唯菩薩薛延

陀為盛太宗冊北突厥莫賀咄為可汗遣統迴紇僕骨
同羅思結阿跌等部迴紇酋帥吐迷度與諸部大破薛
延陀多彌可汗遂併其部曲奄有其地貞觀二十年南
過賀蘭山臨黃河遣使入貢以破薛延陀功賜宴內殿
太宗幸靈武受其降款因請迴鶻已南置郵遞通管北
方太宗為置六府七州府置都督州置刺史府州皆置
長史司馬已下官主之以迴紇部為瀚海府拜其俟利
發吐迷度為懷化大將軍兼瀚海都督時吐迷度已自

稱可汗署官號皆如突厥故事以多覽為燕然府僕骨
為金徽府拔野古為幽陵府同羅為龜林府思結為盧
山府渾都部為臯蘭州斛薩為高闕州阿跌為雞田州
契苾為榆溪州奚結為雞鹿州阿布思為歸林州白霄
為寘顏州又以迴紇西北結骨為堅昆府其北骨利幹
為玄闕州東北俱羅勃為燭龍州於故單于臺置燕然
都護府統之以導賓貢貞觀二十二年吐迷度為其姪
烏紇所殺初烏紇蒸其叔母遂與俱陸莫賀達干俱羅

勃潛謀殺吐迷度以歸車鼻烏紇俱羅勃並車鼻之婿也烏紇遂夜領騎十餘劫吐迷度殺之燕然副都護元禮臣遣人給烏紇云將奏而為都督替吐迷度也烏紇輕騎至禮臣所跪拜致謝禮臣擒而斬之以聞太宗恐廻紇部落携離十月遣兵部尚書崔敦禮往安撫之仍以敦禮為金山道副將軍贈吐迷度左衛大將軍賻物及衣服設祭甚厚以吐迷度子前左屯衛大將軍翊左郎將婆閏為左驍衛大將軍大俟剌發使持節廻紇部

落諸軍事瀚海都督後俱羅勃來朝太宗留之不遣詔
西突厥可汗阿史那賀魯統五啜五俟斤二十餘部居
多羅斯水南去西州馬行十五日程迴紇不肯西屬突
厥永徽二年賀魯破北庭詔將軍梁建方契苾何力領
兵二萬取迴紇五萬騎大破賀魯收復北庭顯慶元年
賀魯又犯邊詔程知節蘇定方任雅相蕭嗣業領兵并
迴紇大破賀魯於陰山再破於金牙山盡收所據之地
西逐至耶羅川賀魯西奔石國婆閼隨蘇定方逐賀魯

至石國西北蘇咄城城主伊涅達干執賀魯送洛陽以
其地置濛池崑陵府以阿史那彌射阿史那步真為二
府都督統十姓左廂五弩失畢右廂五咄陸以賀魯種
落分置州縣西盡波斯加娑閨右衛大將軍兼瀚海都
督永徽六年迴鶻遣兵隨蕭嗣業討高麗龍朔中娑閨
死妹比粟毒主領迴鶻與同羅僕固犯邊高宗命鄭仁
泰討平僕固等比粟毒敗走因以鐵勒本部為天山縣
永隆中獨解支嗣聖中伏帝匐開元中承宗伏帝難並

繼為酋長皆受都督號以統蕃州左殺右殺分管諸部
開元中迴鶻漸盛殺涼州都督王君奭斷安西諸國入
長安路玄宗命郭知運等討逐退保烏德健山南去西
城一千七百里西城即漢之高闕塞也西城北去磧石
口三百里有十一都督本九姓部落一曰藥羅葛即可
汗之姓二曰胡咄葛三曰咄羅勿四曰貊歌息訖五曰
阿勿啗六曰葛薩七曰斛嗚素八曰藥勿葛九曰奚耶
勿每一部落一都督破拔息密收一部落破葛邏祿收

一部落各置都督一人統號十一部落每行止闔戰常以二客部落為軍鋒天寶初其酋長葉護頡利吐發遣使入朝封奉義王三載擊破拔悉密自稱骨咄祿毘伽闕可汗又遣使入朝因冊為懷仁可汗及至德元載七月肅宗於靈武即位遣故邠王男承寀封為燉煌王將軍石定番使于迴紇以修好徵兵及至其牙可汗以女嫁於承寀遣首領來朝請和親封迴紇公主為毘伽公主肅宗在彭原遇之甚厚二載二月迴紇又使首領大

將軍多攬等十五人入朝九月戊寅加承家開府儀同
三司拜宗正卿納廻紇公主為妃廻紇遣其太子葉護
領其將帝德等兵馬四千餘衆助國討逆肅宗宴賜甚
厚又命元帥廣平王見葉護約為兄弟接之頗有恩義
葉護大喜謂王為兄戊子廻紇大首領達干等一十三
人先至扶風與朔方將士見僕射郭子儀留之宴設三
日葉護太子曰國家有難遠來相助何暇食為子儀固
留之宴畢便發其軍每日給羊二百口牛二十頭米四

十碩及元帥廣平王率郭子儀等至香積寺東二十里西臨澧水賊埋精騎於大營東將襲我軍之背朔方左廂兵馬使僕固懷恩指迴紇馳救之匹馬不歸因收西京十月廣平王副元帥郭子儀領迴紇兵馬與賊戰於陝西初次于曲沃葉護使其將軍車鼻施吐撥裴羅等旁南山而東遇賊伏兵于谷中盡殪之子儀至新店遇賊戰軍却數里迴紇望見踰山西嶺上曳白旗而趨擊之直出其後賊衆大敗軍而北坑逐北二十餘里人馬

相枕藉蹂踐而死者不可勝數斬首十餘萬伏屍三十里賊黨嚴莊馳告安慶緒率其黨背東京北走渡河而葉護從廣平王僕射郭子儀入東京初收西京迴紇欲入城劫掠廣平王固止之及收東京迴紇遂入府庫收財帛於市井村坊剽掠三日而止財物不可勝計廣平王又賚之以錦罽寶貝葉護大喜及肅宗還西京十一月癸酉葉護自東京至勅百官於長樂驛迎上御宣政殿宴勞之葉護升殿其餘酋長列於階下賜錦繡繒綵

金銀器皿及辭歸蕃上謂曰能為國家就大事成義勇者卿等力也葉護奏曰迴紇戰兵留在沙苑今且須歸靈夏取馬更收范陽討除殘賊已丑詔曰功濟艱難義存邦國萬里絕域一德同心求之古今所未聞也迴紇葉護特稟英姿挺生奇畧言必忠信行表溫良才為萬人之敵位列諸蕃之長屬凶醜亂常中原未靖以可汗有兄弟之約與國家興父子之軍奮其智謀討彼兇逆一鼓作氣萬里摧鋒二旬之間兩京克定力拔山岳精

貫風雲蒙犯不以辭其勞急難無以踰其分固可懸之
日月傳之子孫豈惟裂土之封誓河之賞而已矣夫位
之崇者司空第一名之大者封王最高可司空仍封忠
義王每載送絹二萬疋至朔方軍宜差使受領乾元元
年五月壬申朔迴紇使多亥阿波八十人黑衣大食酋
長閣之等六人並朝見至閣門爭長通事舍人乃分為
左右從東西門並入六月戊戌宴迴紇使於紫宸殿前
秋七月丁亥詔以幼女封為寧國公主出降其降蕃日

仍以堂弟漢中郡王瑤為特進試太常卿攝御史大夫
克冊命英武威遠毘伽可汗使以堂姪左司郎中巽為
兵部郎中攝御史中丞鴻臚卿副之兼克寧國公主禮
會使特差重臣開府儀同三司行尚書右僕射冀國公
裴冕送至界首癸巳以冊立迴紇英武威遠毘伽可汗
上御宣政殿漢中王瑤受冊命甲午肅宗送寧國公主
至咸陽礪門驛公主泣而言曰國家事重死且無恨上
流涕而還及瑤至其牙帳毘伽闕可汗衣赭黃袍胡帽

坐於帳中榻上儀衛甚盛引瑀立於帳外謂瑀曰王是
天可汗何親瑀曰是唐天子堂弟又問於王上立者為
誰瑀曰中使雷盧俊可汗又報曰中使是奴何得向郎
君上立雷盧俊竦懼跳身向下立定瑀不拜而立可汗
報曰兩國主君臣有禮何得不拜瑀曰唐天子以可汗
有功故將女嫁於可汗結姻好比者中國與外蕃親皆
宗室子女名為公主今寧國公主天子真女又有才貌
萬里嫁與可汗可汗是唐家天子女婿合有禮數豈得

坐於榻上受詔命耶可汗乃起奉詔便受冊命翼日冊公主為可敦蕃酋歡欣曰唐國天子貴重將真女來瑤所送國信繒絲衣服金銀器皿可汗盡分與衙官酋長等及瑤回可汗獻馬五百疋貂裘白氍八月迴紇使王子骨啜特勒及宰相帝德等驍將三千人助國討逆肅宗嘉其遠至賜宴命隨朔方行營使僕固懷恩押之九月甲申迴紇使大首領蓋將等謝公主下降兼奏破堅昆五萬人宴於紫宸殿賜物有差十二月甲午迴紇使

三婦人謝寧國公主之聘也賜宴紫宸殿乾元二年迴紇骨啜特勒等率衆從郭子儀與九節度於相州城下戰不利三月壬子迴紇王子骨啜特勒及宰相帝德等十五人自相州奔于西京肅宗宴之于紫宸殿賞物有差其月庚寅迴紇特勒辭還行營上宴之于紫宸殿賜物有差乙未以迴紇王子新除左羽林軍大將軍員外置骨啜特勒為銀青光祿大夫鴻臚卿員外置夏四月迴紇毘伽闕可汗死長子葉護先被殺乃立其少子登

里可汗其妻為可敦六月丙午以左金吾衛將軍李通為試鴻臚卿攝御史中丞充弔祭迴紇使毘伽闕可汗初死其牙官都督等欲以寧國公主殉葬公主曰我中國法壻死即持喪朝夕哭臨三年行服今迴紇娶婦須慕中國禮若今依本國法何須萬里結婚然公主亦依迴紇法塋面大哭竟以無子得歸秋八月寧國公主自迴紇還詔百官於明鳳門外迎之上元元年九月己丑迴紇九姓可汗使大臣俱陸莫達干等入朝奉表起居

乙卯廻紇使二十人於延英殿通謁賜物有差十一月
戊辰廻紇使延支伽羅等十人於延英殿謁見賜物有
差寶應元年代宗初即位以史朝義尚在河洛遣中使
劉清潭徵兵於廻紇又修舊好其秋清潭入廻紇庭廻
紇已為史朝義所誘云唐家天子頻有大喪國亂無主
請發兵來收府庫可汗乃領衆而南已八月矣清潭賫
勅書國信至可汗曰我聞唐家已無主何為更有勅書
中使對曰我唐家天子雖棄萬國嗣天子廣平王天生

英武往年與迴紇葉護兵馬同收兩京破安慶緒與可汗有故又每年與可汗繒絹數萬疋可汗豈忘之耶然迴紇業已發至三城北見荒城無戍卒州縣盡為空壘有輕唐色乃遣使北收單于兵馬倉糧又大辱清潭清潭發使來奏云迴紇登里可汗傾國自來有衆十萬羊馬不知其數京師大駭上使殿中監藥子昂馳勞之及於太原北忻州南子昂密數其丁壯得四千人老小婦人相兼萬餘人戰馬四萬匹牛羊不紀先是毘伽闕可

汗請以子婚肅宗以僕固懷恩女嫁之及是為可敦與
可汗同來請懷恩及懷恩母相見上勅懷恩自汾州見
之於太原懷恩又諫國家恩信不可違背初欲自蒲關
入取沙苑路由潼關東向破賊子昂說之云國家頻遭
寇逆州縣虛乏難為供擬恐可汗失望不如取土門路
入直取邢洛衛懷賊中兵馬盡在東京可汗收其財帛
東裝南向最為上策可汗不從又說取懷州太行路南
據河陰之險直扼賊之喉亦上策也可汗又不從又說

取陝州太陽津路食太原倉粟而東與澤潞河南懷鄭
節度同入亦上策也可汗從之子昂因入奏上以雍王
适為兵馬元帥加懷恩同中書門下平章事又以子昂
兼御史中丞與前潞府兼御史中丞魏珪為左右廂兵
馬使以中書舍人韋少華充元帥判官兼掌書記給事
中李進兼御史中丞充元帥行軍司馬東會迴紇登里
可汗營於陝州黃河北元帥雍王領子昂等從而見之
可汗責雍王不於帳前舞蹈禮倨子昂辭以元帥是嫡

孫兩宮在殯不合有舞蹈迴紇宰相及車鼻將軍庭詰
曰唐天子與登里可汗約為兄弟今可汗即雍王叔叔
姪有禮數何得不舞蹈子昂苦辭以身有喪禮不合又
報云元帥即唐太子也太子即諸君也豈有中國諸君
向外國可汗前舞蹈相拒久之車鼻遂引子昂李進少
華魏琚各榜捶一百少華琚因榜捶一宿而死以王少
年未諳事故歸本營而懷恩與迴紇右殺為先鋒及諸
節度同攻賊破之史朝義率殘寇而走元帥雍王退歸

靈寶迴紇可汗繼進於河陽列營而止數月去營百餘里人被剽劫逼辱不勝其弊懷恩常為軍殿及諸節度收河北州縣僕固瑒與迴紇之衆追躡二千餘里至平州石城縣臬朝義首而歸河北悉平懷恩自相州西出崞口路而西可汗自河陽北出澤潞與懷恩會厯太原遣使拔賀那上表賀收東京并進逆賊史朝義旌旗等物辭還蕃代宗引見於內殿賜綵二百段初迴紇至東京以賊平恣行殘忍士女懼之皆登聖善寺及白馬寺

二閣以避之廻紇縱火焚二閣傷死者萬計累旬火焰不止及是朝賀又縱橫大辱官吏以陝州節度使郭英乂權知東都留守時東郡再經賊亂翔方軍及郭英乂魚朝恩等軍不能禁暴與廻紇縱掠坊市及汝鄭等州比屋蕩盡人悉以紙為衣或有衣經者代宗御宣政殿出冊文加冊可汗為登里誦咄咄登密施含俱錄英義建功毘伽可汗可敦加冊為婆墨光親龐華毘伽可敦誦咄華言社稷法用登密施華言封竟含俱錄華言婁羅

毘伽華言足意智婆墨華言得憐以散騎常侍兼御史大夫王翊充使就可汗行營行冊命焉可汗可敦及左右殺諸都督內外宰相已下共加實封二千戶令王翊就牙帳前禮冊左殺封為雄翔王右殺封為寧翔王胡祿都督封金河王拔覽將軍封為靜漠王諸都督一十人並封國公尋而懷恩叛投靈武有翔方舊將任敷張韶等收合餘燼衆至數萬廣德二年秋乃引吐蕃之衆數萬人至奉天縣翔方節度郭子儀率衆拒之而退

永泰元年秋懷恩遣兵馬使范志誠任敷將兵又誘迴紇吐蕃吐谷渾党項奴刺之衆二十餘萬以犯奉天醴泉鳳翔同州等處被其逆命先以郭子儀屯涇陽渾日進屯奉天數摧其鋒又聞懷恩死吐蕃將馬重英等十月初引退取邠州舊路而歸迴紇首領羅達干等率其衆二千餘騎詣涇陽請降子儀許之率衆被甲持滿數千人迴紇譯曰此來非惡心要見令公子儀曰我令公也迴紇曰請去甲子儀便脫兜鍪鎗甲策馬挺身而前

迴紇酋長相顧曰是也時太子太保李光進兼御史大夫路嗣恭戎裝介馬在子儀之側子儀指視迴紇曰此是渭北節度李太保又曰此是朔方軍糧使路大夫迴紇便下馬羅拜子儀亦下馬迴紇之衆為左右翼各數百人漸進子儀麾下亦馳而至子儀麾退之子儀命酒與之飲贈之纏頭綵三千匹子儀執迴紇大將可汗弟合胡祿都督藥羅葛等手責讓之曰我國家知汝迴紇有功報汝大厚汝何背約負信犯我王畿我須與汝戰

何乃降為我一身挺入汝營任汝拘繫我麾下將士須
與汝戰迴紇又譯曰懷恩負心來報可汗云唐國天子
今已向江淮令公亦不主兵我是以敢來今知天可汗
見在上郭令公為將懷恩天又殺之今請追殺吐蕃叔
其羊馬以報國恩然懷恩子可敦兄弟請勿殺之合胡
祿都督等與宰相磨咄莫賀達干宰相噉莫賀達干宰
相護都毘伽將軍宰相揭拉裴羅達干宰相梅錄大將
軍羅達干平章事海盈闕達干等子儀先執杯合胡祿

都督請咒子儀咒曰大唐天子萬萬歲迴紇可汗亦萬歲兩國將相亦萬歲若起負心違背盟約者身死陣前家口屠戮合胡祿都督等失色及杯至即譯曰如令公盟約皆喜曰初發本部來日將巫師兩人來云此行大安稳然不與唐家兵馬聞見一大人即歸今日領兵見令公令公不為疑脫去衣甲單騎相見誰有此心膽是不戰鬪見一大人巫師有徵矣歡躍久之子儀撫其背首領等分纏頭絲以賞巫師請諸將同擊吐蕃子儀如

其約翌日使領廻紇首領開府古野那等六人入京朝
見又五日朔方先鋒兵馬使開府南陽郡王白元光與
廻紇兵馬合於涇州靈臺縣西五十里赤山嶺共破吐
蕃等十餘萬衆斬首五萬餘級生擒一萬餘人駝馬牛
羊凡百里相繼不可勝紀收得蕃落五千餘人初白元
光等到靈臺縣西探知賊勢為月明思少陰晦廻紇使
巫師便致風雪及遲明戰吐蕃盡寒凍弓矢皆廢披氊
徐進元光與廻紇隨而殺之蔽野僕固名臣懷恩之姪

尤為驍將亦領千餘騎來降尋而子儀又使迴紇宰相
護地毘伽將軍宰相梅祿大將軍開府儀同三司試太
常卿羅達干等一百九十六人來見上賜宴於延英殿
賜賚甚厚閏月子儀自涇陽領僕固名臣入奏迴紇進
馬及宴別前後賫繒綵十萬匹而還時帑藏空虛朝官
無祿俸隨月給手力謂之資課錢稅朝官閏十月十一
月十二月課以供之大厯六年正月迴紇於鴻臚寺擅
出坊市掠人子女所在官奪返毆怒以三百騎犯金光

門朱雀門是日皇城諸門盡閉上使中使劉清潭宣慰
乃止七年七月廻紇出鴻臚寺入坊市強暴逐長安令
邵說於含光門之街奪說所乘馬將去說脫身避走有
司不能禁八年十一月廻紇一百四十人還蕃以信物
一千餘乘廻紇恃功自乾元之後屢遣使以馬和市繒
帛仍歲來市以馬一匹易絹四十匹動至數萬馬其使
候遣繼留於鴻臚寺者非一蕃得帛無厭我得馬無用
朝廷甚苦之是時特詔厚賜遣之示以廣恩且俾知愧

也是月廻紇使使赤心領馬一萬匹來求市代宗以馬價出於租賦不欲重困於民命有司量入計許市六千匹十年九月廻紇白晝刺人於東市市人執之拘於萬年縣其首領赤心聞之自鴻臚寺馳入縣獄劫囚而出斫傷獄吏十三年正月廻紇寇太原過榆次太谷河東節度留後太原尹兼御史大夫鮑防與廻紇戰于陽曲我師敗績死者千餘人代州都督張光晟與廻紇戰于羊武谷破之廻紇引退先是辛雲京守太原廻紇懼雲

京不敢窺并代知鮑防無武畧乃敢凌逼賴光晟邀戰
勝之北人乃安德宗初即位使中官梁文秀告哀於迴
紇且修舊好可汗移地健不為禮而九姓胡素屬於迴
紇者又陳中國便利以誘其心可汗乃舉國南下將乘
我喪其宰相頓莫賀達干諫曰唐大國也且無負於我
前年入太原獲羊馬數萬計可謂大捷矣以道途艱阻
比及國傷耗殆盡今若舉而不捷將安歸乎可汗不聽
頓莫賀乘人之心因擊殺之并殺其親信及九姓胡所

誘來者凡二千人頓莫賀自立號為合骨咄祿毘伽可汗使其酋長建達干隨文秀來朝命京兆尹源休持節冊為武義成功可汗貞元三年八月迴紇可汗遣首領墨啜達干多覽將軍合闕達干等來貢方物且請和親四年十月迴紇公主及使至自蕃德宗御延喜門見之時迴紇可汗喜於和親其禮甚恭上言昔為兄弟今為子壻半子也又詈辱吐蕃使者及使大首領等妻妾凡五十六婦人來迎可敦凡遣人千餘納聘馬二千德宗

令朔州太原分留七百人其宰相首領皆至分館鴻臚
將作癸巳見於宣政殿乙未德宗召迴紇公主出使者
對於麟德殿各有頒賜庚子詔咸安公主降迴紇可汗
仍置府官屬視親王例以殿中監嗣滕王湛然為咸安
公主婚禮使闕播榆校右僕射送咸安公主及冊迴紇
可汗使貞元五年十二月迴紇汨咄祿長壽天親毘伽
可汗薨廢朝三日文武三品已上就鴻臚寺弔其來使
貞元六年六月迴紇使移職伽達干歸蕃賜馬價絹三

十萬匹以鴻臚卿郭鋒兼御史大夫充冊迴紇忠貞可汗使是歲四月忠貞可汗為其弟所殺而篡立時迴紇大將頡干伽斯西擊吐蕃未回其次相率國人縱殺篡者而立忠貞之子為可汗年方十六七及六月頡干伽斯西討回將至牙帳次相等懼其後有廢立不欲漢使知之留鋒數月而回頡干伽斯之至也可汗等出迎郊野陳郭鋒所送國信噐幣可汗與次將相等皆俯伏自說廢立之由且請命曰惟大相生死之悉以所陳噐幣

贈頡干伽斯以悅之可汗又拜泣曰兒愚幼無知今幸
得立惟仰食於阿爹可汗以子事之頡干伽斯以卑遜
興感乃相持號哭遂執臣子之禮焉盡以所陳噐幣頒
賜左右諸從行將士已無所取自是其國稍安乃遣達
比特勒梅錄將軍告忠貞可汗之哀于我且請冊新君
使至廢朝三日仍令三品已上官就鴻臚寺弔其使是
歲吐蕃陷北庭都護府初北庭安西既假道於迴紇以
朝奏因附庸焉迴紇徵求無厭北庭差近凡生事之資

必強取之。又有沙陀部落六千餘帳與北庭相依亦屬於廻紇。肆行抄奪。尤所厭苦。其先葛祿部落及白服突厥素與廻紇通和。亦憾其侵掠。因吐蕃厚賂見誘。遂附之。於是吐蕃率葛祿白服之衆去冬寇北庭。廻紇大相頡干伽斯率衆援之。頻敗吐蕃。急攻之。北庭之人既苦廻紇。乃舉城降焉。沙陀部落亦降。節度使檢校工部尚書楊襲古將麾下二千餘衆出奔西州。頡干利亦還。十年秋。悉其國丁壯五萬人召襲古將復焉。俄為所敗。死

者大半頡干利收合餘燼晨夜奔還襲古餘衆僅百六十將復入西州頡干伽斯紿之曰第與我同至牙帳當送君歸本朝既及牙帳留而不遣竟殺之自是安西阻絕莫知存亡唯西州之人猶固守焉頡干伽斯敗葛祿乘勢取迴紇之浮圖川迴紇震恐悉遷西北部落羊馬於牙帳之南以避之貞元七年五月庚申朔以鴻臚少卿庾鋌兼御史大夫冊迴紇可汗及弔祭使是月迴紇遣使律支達干等來朝告小寧國公主薨廢朝三日故

肅宗以寧國公主降迴紇又以榮王女媵之及寧國來
歸榮王女為可敦迴紇號為小寧國公主厯配英武英
義二可汗及天親可汗立出居於外生英武二子為天
親可汗所殺無幾薨七年八月迴紇遣使獻敗吐蕃葛
祿於北庭所捷及其俘畜先是吐蕃入靈州為迴紇所
敗夜以火攻駭而退十二月迴紇遣殺支將軍獻吐蕃
俘大首領結心德宗御延喜門觀之八年七月以迴紇
藥羅葛靈檢校右僕射靈本唐人姓呂氏因入迴紇為

可汗養子遂以可汗姓為藥羅葛靈在國用事因來朝
寵賚甚厚仍給市馬絹七萬匹九年九月遣使來朝貢
貞元十一年六月庚寅冊拜迴紇騰里邏羽錄沒密施
合祿胡毘懷信可汗元和四年謁德曷里祿沒弭施合
密毘迦可汗遣使改為迴鶻義取迴旋輕捷如鶻也八
年四月迴鶻請和親使伊難珠還蕃宴于三殿賜以銀
器繒帛是歲迴鶻數千騎至礪鶻泉邊軍戒嚴十二月
二日宴歸國迴鶻摩尼八人令至中書見宰臣先是迴

鵬請和親憲宗使有司計之禮費約五百萬貫方內有誅討未任其親以摩尼為迴鵬信奉故使宰臣言其不可乃詔宗正少卿李孝誠使于迴鵬太常博士殷侑副之諭其來請之意長慶元年毘伽保義可汗薨輟朝三日仍令諸司三品已上官就鴻臚寺弔其使者四月正衙冊迴鵬君長為登羅羽錄沒密施句主錄毘伽可汗以少府監裴通為檢校左散騎常侍兼御史大夫持節冊立兼弔祭使五月迴鵬宰相都督公主摩尼等五百

七十三人入朝迎公主於鴻臚寺安置勅太和公主出降迴鶻為可敦宜令中書舍人王起赴鴻臚寺宣示以左金吾衛大將軍胡証檢校戶部尚書持節充送公主入迴鶻及冊可汗使光祿卿李憲加兼御史中丞充副使太常博士殷侑改殿中侍御史充判官吐蕃犯青塞堡以迴紇和親故也鹽州刺史李文悅發兵擊退之迴鶻奏以一萬騎出北庭一萬騎出安西拓吐蕃以迎太和公主歸國其月勅太和公主出降迴紇宜特置府其

官屬宜視親王例迴鶻自咸安公主歿後屢歸款請繼前好久未之許至元和末其請彌切憲宗以吐虜有勲勞於王室又西戎比歲為邊患遂許以妻之既許而憲宗崩穆宗即位踰年乃封第十妹為太和公主將出降迴紇登邏骨沒密施合毘伽可汗遣使伊難珠句錄都督思結并外宰相駙馬梅錄司馬兼公主一人葉護公主一人及達干并駝馬千餘來迎太和公主發赴迴紇國穆宗御通化門左个臨送使百寮章敬寺前立班儀

衛甚盛士女傾城觀焉十一月振武節度張惟清奏準
詔發兵三千赴蔚州數內已發一千人訖餘二千人待
太和公主出界即發遣又奏天德轉牒云迴鶻七百六
十人將駝馬及車相次至黃蘆泉迎候公主豐州刺史
李祐奏迎太和公主迴鶻三千於卿泉下營拓吐蕃二
年二月賜迴紇馬價絹五萬匹三月又賜馬價絹七萬
匹是月裴度招討幽鎮之亂迴鶻請以兵從度討伐朝
議以寶應初迴紇收復兩京恃功驕恣難制咸以為不

可遂命中使止廻紇令歸會其已上豐州北界不從上
詔發繒帛七萬匹賜之方還五月命使冊立登囉骨沒
密施合毘伽禮可汗遣品官田務豐領國信十二車使
廻鶻賜可汗及太和公主長慶二年閏十月金吾大將
軍胡証副使光祿卿李憲婚禮使衛尉卿李銳副使宗
正少卿李子鴻判官虞部郎中張敏太常博士殷侑送
太和公主至自廻紇皆云初公主去廻紇牙帳尚可信
宿可汗遣數百騎來請與公主先從他道去胡証曰不

可虜使曰前咸安公主來時去花門數百里即先去今
何獨拒我証曰我天子詔送公主以授可汗今未見可
汗豈宜先往虜使乃止既至虜庭乃擇吉日冊公主為
迴鶻可敦可汗先升樓東向坐設氊幄於樓下以居公
主使羣胡主教公主以胡法公主始解唐服而衣胡服
以一姬侍出樓前西向拜可汗坐而視公主再俯拜訖
復入氊幄中解前所服而披可敦服通裙大襦皆茜色
金飾冠如角前指後出樓俯拜可汗如初禮虜先設大

輿曲宸前設小座相者引公主升輿廻紇九姓相分負其輿隨日右轉於庭者九公主乃降輿升樓與可汗俱東向坐自此臣下朝謁并拜可敦可敦自有牙帳命二相出入帳中証等將歸可敦宴之帳中留連號啼者竟日可汗因贈漢使以厚貺太和元年命中使以絹二十萬匹付鴻臚寺宣賜廻鶻充馬價三年正月中使以絹二十十三萬匹賜廻紇充馬價七年三月廻紇李義節等將駝馬到且報可汗三月二十七日薨已冊親弟薩特

勒廢朝三日仍令諸司文武三品尚書省四品已上官
就鴻臚寺弔其使者以左驍衛將軍皇城留守唐弘實
為金吾將軍兼御史大夫持節充入迴鶻弔祭冊立使
九年六月入朝迴鶻進太和公主所獻馬射女子七人
沙陀小兒二人開成初其相有安允合者與特勒柴草
欲篡薩特勒可汗薩特勒可汗覺殺柴草及安允合又
有迴紇相掘羅勿者擁兵在外怨誅柴草安允合又殺
薩特勒可汗以盧駁特勒為可汗有將軍句錄末賀恨

掘羅勿走引黠戛斯領十萬騎破迴鶻城殺廬駁斬掘羅勿燒蕩殆盡迴鶻散奔諸蕃有迴鶻相馭職者擁外甥龐特勒及男鹿并遏粉等兄弟五人一十五部西奔葛邏祿一支投吐蕃一支投安西又有近可汗牙十三部以特勒烏介為可汗南來附漢初黠戛斯破迴鶻得太和公主黠戛斯自稱李陵之後與國同姓遂令達干十人送公主至塞上烏介途遇黠戛斯使達干等並被殺太和公主却歸烏介可汗乃質公主同行南渡大磧

至天德界奏請天德城與太和公主居有迴鶻相赤心者與連位相姓僕固者與特勒那頡啜擁部衆不賓烏介赤心欲犯塞烏介遣其屬盟沒斯先布誠於天德軍使田牟然後誘赤心宰相同謁烏介可汗戮赤心於可汗帳下并僕固二人那頡戰勝全占赤心下七千帳東瞰振武大同據室韋黑沙榆林東南入幽州雄武軍西北界幽州節度使張仲武遣弟仲至率兵大破那頡之衆全收七千帳殺戮收擒老小近九萬人那頡中箭透

駝羣潛脫烏介獲而殺之烏介諸部猶稱十萬衆駐牙
大同軍北閭門山時會昌二年秋頻劫東陝已北天德
振武雲朔比罹俘戮詔諸道兵悉至防捍以河東節度
使劉沔充南面招控迴鶻使以幽州節度使張仲武充
東面招控迴鶻使二年冬三月春迴鶻特勒龐俱遮阿
敦寧二部迴鶻公主密羯可敦一部外相諸洛固阿跌
一部及牙帳大將曹磨你等七部共三萬衆相次降於
幽州詔配諸道有特勒溫沒斯阿歷支習勿啜三部迴

鵲相愛耶勿弘順迴鵲尚書呂衡等諸部降振武三部
首領皆賜姓李氏及名思忠思貞思惠思恩充歸義使
有特勒葉被沽兄李二部南奔吐蕃有特勒可質力二
部東北奔大室韋有特勒荷勿啜東討契丹戰死會昌
三年迴鵲尚書僕固繹到幽州約以太和公主歸幽州
烏介去幽州界八十里下營其親信骨肉及摩尼志淨
等四人已先入振武軍是夜河東劉沔率兵奄至烏介
營烏介驚走東北約四百里外依和解室韋下營不及

將太和公主同走豐州刺史石雄兵遇太和公主帳因迎歸國烏介部衆至大中元年詣幽州降留者漂流餓凍衆十萬所存只三千已下烏介嫁妹與室韋託附之為迴鶻相美權者逸隱啜逼諸迴鶻殺烏介於金山以其弟特勒遏捻為可汗復有衆五千已上其食用糧羊皆取給於奚王碩舍朗大中元年春張仲武大破奚衆其迴鶻無所取給日有耗散至二年春唯存名王貴臣五百人已下依室韋張仲武因賀正室韋經過幽州仲

武却令還蕃遣送遏捻等來向幽州遏捻等懼是夜與妻葛祿子特勒毒斯等九騎西走餘衆奔之不及迴鶻諸相達官老幼大哭室韋分迴鶻餘衆為七分七姓室韋各占一分經三宿黠戛斯相阿播領諸蕃兵稱七萬從西南天德北界來取遏捻及諸迴鶻大敗室韋迴鶻在室韋者阿播皆收歸磧北在外猶數帳散藏諸山深林盜劫諸蕃皆西向傾心望安西龐勒之到龐勒已自稱可汗有磧西諸城其後嗣君弱臣強居甘州無復昔

時之盛到今時遣使入朝進玉馬二物及本土所產交
易而返

史臣曰自三代已前兩漢之後西羌北狄互興部族其
名不同為患一也蔡邕云邊陲之患為手足之疥中國
之困為胸背之疽突厥為煬帝之患深矣隋竟滅中國
之困其理昭然自太宗平突厥破延陀而迴紇興焉太
宗幸靈武以降之置州府以安之以名爵玉帛以恩之
其義何哉蓋以狄不可盡而以威惠羈縻之開元中三

綱正百姓足四夷八蠻翕然向化要荒之外畏威懷惠
不其盛矣天寶末奸臣弄權於內逆臣跋扈於外內外
結讐而車駕遽遷華夷生心而神器將墜肅宗誘迴紇
以復京畿代宗誘迴紇以平河朔戡難中興之功大即
大矣然生靈之膏血已乾不能供其求取朝廷之法令
並弛無以抑其憑陵忍耻和親姑息不暇僕固懷恩為
叛尤甚玷危郭子儀之能軍終免侵軼比昔諸戎於國
之功最大為民之害亦深及勢利日隆盛衰時變冰消

瓦解如存若亡竟為手足之疥焉僖昭之世黃朱迭興
竟為胸背之疽焉手疥背疽誠為確論

贊曰土德初隆比屋可封朝綱中否邊鄙興戎安史亂
國迴紇恃功恃功伊何咸議姑息民不聊生國殫其力
華夷有截盛衰如織彼既長惡我乃修德疽疥之義百
代可則

舊唐書卷一百九十五

舊唐書卷一百九十五考證

迴紇傳吐蕃徵求無厭○臣酉按新書作迴紇觀後云
吐庭之人既苦迴紇乃舉城降則吐蕃當作迴紇無
疑今改正

舊唐書卷一百九十五考證

欽定四庫全書

舊唐書卷一百九十六上

後晉司空同中書門下平章事劉 昫撰

列傳第一百四十六上

吐蕃上

吐蕃在長安之西八千里本漢西羌之地也其種落莫知所出也或云南涼禿髮利鹿孤之後也利鹿孤有子曰樊尼及利鹿孤卒樊尼尚幼弟儁檀嗣位以樊尼為

安西將軍後魏神瑞元年偃檀為西秦乞佛熾盤所滅
樊尼招集餘衆以投沮渠蒙遜蒙遜以為臨松太守及
蒙遜滅樊尼乃率衆西奔濟黃河逾積石於羌中建國
開地千里樊尼威惠夙著為羣羌所懷皆撫以恩信歸
之如市遂改姓為宰勃野以禿髮為國號語訛謂之吐
蕃其後子孫繁昌又侵伐不息土宇漸廣歷周及隋猶
隔諸羌未通於中國其國人號其王為贊普相為大論
小論以統理國事無文字刻木結繩為約雖有官不常

厥職臨時統領徵兵用金箭寇至舉烽燧百里一亭用
刑嚴峻小罪刺眼鼻或皮鞭鞭之但隨喜怒而無常科
囚人於地牢深數丈二三年方出之宴異國賓客必驅
犛牛令客自射牲以供饌與其臣下一年一小盟刑羊
狗獼猴先折其足而殺之繼裂其腸而屠之令巫者告
於天地山川日月星辰之神云若心遷變懷奸反覆神
明鑒之同於羊狗三年一大盟夜於壇墠之上與衆陳
設肴饌殺犬馬牛驢以為牲咒曰爾等咸須同心戮力

共保我家惟天神地祇共知爾志有負此盟使爾身體
屠裂同於此牲其地氣候大寒不生秔稻有青麴麥登
豆小麥蕎麥畜多犛牛猪犬羊馬又有天鼠狀如雀鼠
其大如猫皮可為裘又多金銀銅錫其人或隨畜牧而
不常厥居然頗有城郭其國都城號為邏些城屋皆平
頭高者至數十尺貴人處於大氊帳名為拂廬寢處汙
穢絕不櫛沐接手飲酒以氊為盤捻麩為椀實以羹酪
并而食之多事獬狫之神人信巫覡不知節候麥熟為

歲首圍碁陸博吹蠡鳴鼓為戲弓劍不離身重壯賤老
母拜於子子倨於父出入皆少者在前老者居其後軍
令嚴肅每戰前隊皆死後隊方進重兵死惡病終累代
戰沒以為甲門臨陣敗北者懸狐尾於其首表其似狐
之怯稠人廣眾必以狗罵其俗耻之以為次死拜必兩
手據地作狗吠之聲以身再揖而止居父母喪截髮青
黛塗面衣服皆黑既葬即吉其贊普死以人殉葬衣服
珍玩及嘗所乘馬弓劍之類皆悉埋之仍於墓上起大

室立土堆插雜木為祠祭之所貞觀八年其贊普棄宗
弄讚始遣使朝貢弄讚弱冠嗣位性驍武多英略其鄰
國羊同及諸羌並賓伏之太宗遣行人馮德遐往撫慰
之見德遐大悅聞突厥及吐谷渾皆尚公主乃遣使隨
德遐入朝多賫金寶奉表求婚太宗未之許使者既反
言於弄讚曰初至大國待我甚厚許嫁公主會吐谷渾
王入朝有相離間由是禮薄遂不許嫁弄讚遂與羊同
連發兵以擊吐谷渾吐谷渾不能支遁於青海之上以

避其鋒其國人畜並為吐蕃所掠於是進兵攻破党項
及白蘭諸羌率其衆二十餘萬頓於松州西境遣使貢
金帛云來迎公主又謂其屬曰若大國不嫁公主與我
即當入寇遂進攻松州都督韓威輕騎覘賊反為所敗
邊人大擾太宗遣吏部尚書侯君集為當彌道行營大
總管右領軍大將軍執失思力為白蘭道行軍總管左
武衛將軍牛進達為闊水道行軍總管右領軍將軍劉
蘭為洮河道行軍總管率步騎五萬以擊之進達先鋒

自松州夜襲其營斬千餘級弄讚大懼引兵而退遣使謝罪因復請婚太宗許之弄讚乃遣其相祿東贊致禮獻金五千兩自餘寶玩數百事貞觀十五年太宗以文成公主妻之令禮部尚書江夏郡王道宗主婚持節送公主於吐蕃弄讚率其部兵次栢海親迎於河源見道宗執子壻之禮甚恭既而歎大國服飾禮儀之美俯仰有愧沮之色及與公主歸國謂所親曰我父祖未有通婚上國者今我得尚大唐公主為幸實多當為公主築

一城以誇示後代遂築城邑立棟宇以居處焉公主惡
其人赭面弄讚令國中權且罷之自亦釋氍毹襲紈綺
漸慕華風仍遣酋豪子弟請入國學以習詩書又請中
國識文之人典其表疏太宗伐遼東還遣祿東贊來賀
奉表曰聖天子平定四方日月所照之國並為臣妾而
高麗恃遠闕於臣禮天子自領百萬度遼致討隕城陷
陣指日凱旋夷狄繞聞陛下發駕少進之間已聞歸國
鴈飛迅越不及陛下速疾奴忝預子壻喜百常夷夫鵠

猶鴈也故作金鵝奉獻其鵝黃金鑄成其高七尺中可實酒三斛二十二年右衛率府長史王玄策使往西域為中天竺所掠吐蕃發精兵與玄策擊天竺大破之遣使來獻捷高宗嗣位授弄讚為駙馬都尉封西海郡王賜物二千段弄讚因致書於司徒長孫無忌等云天子初即位若臣下有不忠之心者當勒兵以赴國除討并獻金銀珠寶十五種請置太宗靈座之前高宗嘉之進封為賓王賜雜綵三千段因請蠶種及造酒碾磑紙墨

之匠並許焉乃刊石像其形列昭陵玄闕之下永徽元年弄讚卒高宗為之舉哀遣右武侯將軍鮮于臣濟持節賫璽書弔祭弄讚子早死其孫繼立復號贊普時年幼國事皆委祿東贊祿東姓婆氏雖不識文記而性明毅嚴重講兵訓師雅有節制吐蕃之并諸羗雄霸本土多其謀也初太宗既許降文成公主贊普使祿東贊來迎召見顧問進對合旨太宗禮之有異諸蕃乃拜祿東贊為右衛大將軍又以琅邪長公主外孫女段氏妻之

祿東贊辭曰臣本國有婦父母所聘情不忍乖且贊普
未謁公主陪臣安敢輒娶太宗嘉之欲撫以厚恩雖奇
其答而不遂其請祿東贊有子五人長曰贊悉若早死
次欽陵次贊婆次悉多千次勃論及東贊死欽陵兄弟
復專其國後與吐谷渾不和龍朔麟德中遞相表奏各
論曲直國家依違未為與奪吐蕃怨怒遂率兵以擊吐
谷渾吐谷渾大敗河源王慕容諾曷鉢及弘化公主脫
身走投涼州遣使告急咸亨元年四月詔以右威衛大

將軍薛仁貴為邏婆道行軍大總管左衛員外大將軍
阿史那道真右衛將軍郭待封為副率衆十餘萬以討
之軍至大非川為吐蕃大將論欽陵所敗仁貴等並坐
除名吐谷渾全國盡沒唯慕容諾曷鉢及其親信數千
帳來內屬仍徙於靈州自是吐蕃連歲寇邊當悉等州
諸羌盡降之上元三年進寇鄯廓等州殺掠人吏高宗
命尚書左僕射劉仁軌往洮河軍鎮守以禦之儀鳳三
年又命中書令李敬玄兼鄯州都督往代仁軌於洮河

鎮守仍召募關內河東及諸州驍勇以為猛士不簡色役亦有嘗任文武官者召入殿庭賜宴遣往擊之又令益州長史李孝逸舊州都督拓王奉等發劍南山南兵募以防禦之其年秋敬玄與工部尚書劉審禮率兵與吐蕃戰於青海官軍敗績審禮沒於陣敬玄按軍不敢救俄而收軍却出頌於承風嶺阻泥溝不能動賊屯於高岡以壓之偏將左領軍員外將軍黑齒常之率敢死之士五百人夜斫賊營賊遂潰亂自相蹂踐死者三百

餘人散立遂擁衆鄯州坐改為衡州刺史往劔南兵募
於茂州之西南築安戎城以壓其境俄有生羌為吐蕃
鄉導攻陷其城遂引兵守之時吐蕃盡收羊同党項及
諸羌之地東與涼松茂舊等州相接南至婆羅門西又
攻陷龜茲疎勒等四鎮北抵突厥地方萬餘里自漢魏
已來西戎之盛未之有也高宗聞審禮等敗沒召侍臣
問綏禦之策中書舍人郭正一曰吐蕃作梗年歲已深
命將興師相繼不絕空勞士馬虛費糧儲近討則徒損

兵威深入則未窮巢穴望少發兵募且遣備邊明烽堠勿令侵抄使國用豐足人心叶同寬之數年可一舉而滅給事中劉齊賢皇甫文亮等皆言嚴守之便尋而黑齒常之破吐蕃大將贊婆及素和貴於良非川殺獲二千餘級吐蕃遂引退詔以常之為河源軍使以鎮禦之儀鳳四年贊普卒其子器弩悉弄嗣位復號贊普時年八歲國政復委於欽陵遣其大臣論寒調傍來告喪且請和高宗遣郎將宋令文入蕃會葬永隆元年文成公

主薨高宗又遣使弔祭之則天臨朝命文昌右相韋待
價為安息道大總管安西大都護閼溫古為副永昌元
年率兵往征吐蕃遲留不進待價坐流浦州溫古處斬
待價素無統禦之才遂狼狽失據士卒饑饉皆轉死溝
壑明年又命文昌右相岑長倩為武威道行軍大總管
以討吐蕃中路退還軍竟不行如意元年吐蕃大首領
曷蘇率其所屬并貴川部落請降則天令右玉鈴衛大
將軍張玄遇率精卒二萬充安撫使以納之師次大渡

水昌蘇事洩為本國所擒又有大首領咎捶率羌蠻部落八千餘人詣玄遇內附玄遇以其部落置葉川州以咎捶為刺史仍於大度西山勒石紀功而還長壽元年武威軍總管王孝傑大破吐蕃之衆克復龜茲于闐疎勒碎葉等四鎮乃於龜茲置安西都護府發兵以鎮守之萬歲登封元年孝傑復為肅邊道大總管率副總管婁師德與吐蕃將論欽陵贊婆戰於素羅汗山官軍敗績孝傑坐免官萬歲通天元年吐蕃四萬衆奄至涼州

城下都督許欽明初不之覺輕出按部遂遇賊拒戰久之力屈為賊所殺時吐蕃又遣使請和則天將許之論欽陵乃請去安西四鎮兵仍索分十姓之地則天竟不許之吐蕃自論欽陵兄弟專統兵馬欽陵每居中用事諸弟分據方面贊婆則專在東境與中國為隣三十餘年常為邊患其兄弟皆有才略諸蕃憚之聖歷二年其贊普器弩悉弄年漸長乃與其大臣論巖等密圖之時欽陵在外贊普乃佯言將獵召兵執欽陵親黨二千餘

人殺之發使召欽陵贊婆等欽陵舉兵不受召贊普自帥衆討之欽陵未戰而潰遂自殺其親信左右同日自殺者百餘人贊婆率所部千餘人及其兄子莽布支等來降則天遣羽林飛騎郊外迎之授贊婆輔國大將軍行右衛大將軍封歸德郡王優賜甚厚仍令領其部兵於洪源谷討擊尋卒贈特進安西大都護久視元年吐蕃又遣其將趨莽布支寇涼州圍逼昌松縣隴右諸軍州大使唐休璟與莽布支戰於洪源谷斬其副將二人

獲首二千五百級長安二年贊普率衆萬餘人寇悉州
都督陳大慈與賊凡四戰皆破之斬首千餘級於是吐
蕃遣使論彌薩等入朝請求和則天宴之於麟德殿奏
百戲於殿庭論彌薩曰臣生於邊荒由來不識中國音
樂乞放臣親觀則天許之於是論彌薩等相視笑忭拜
謝曰臣自歸投聖朝前後禮數優渥又得親觀竒樂一
生所未見自顧微瑣何以仰答天恩區區褊心唯願大
家萬歲明年又遣使獻馬千匹金二千兩以求婚則天

許之時吐蕃南境屬國泥婆羅門等皆叛贊普自往討之卒於軍中諸子爭立久之國人立噶弩悉弄之子棄隸蹈贊為贊普時年七歲中宗神龍元年吐蕃使來告喪中宗為之舉哀廢朝一日俄而贊普之祖母遣其大臣悉薰然來獻方物為其孫請婚中宗以所養雍王宗禮女為金城公主許嫁之自是頻歲貢獻景龍三年十一月又遣其大臣尚贊吐等來迎女中宗宴之於苑內毬塲命駙馬都尉楊慎交與吐蕃使打毬中宗率侍臣

觀之四年正月制曰聖人布化用百姓為心王者垂仁
以八荒無外故能光宅遐邇裁成品物由是隆周理歷
恢柔遠之圖強漢乘時建和親之議斯蓋御寓長策經邦
茂範朕受命上靈克纂洪業庶幾前烈永致和平睠彼
吐蕃僻在西服皇運之始早申朝貢太宗文武聖皇帝
德侔覆載情深億兆思偃兵甲遂通姻好數十年間一
方清淨自文成公主化往其國因多變革我之邊隅亟
興師旅彼之蕃落頗聞彫弊頃者贊普及祖母可敦酋

長等屢披誠款積有歲時思託舊親請宗新好金城公
主朕之少女豈不鍾念但為人父母志息元黎若允乃
誠祈更敦和好則邊土寧晏兵役服息遂割深慈為國
大計築茲外館聿膺嘉禮降彼吐蕃贊普即以今月進
發朕親自送於郊外中宗召侍中紀處訥謂曰昔文成
公主出降則江夏王送之卿雅識蕃情有安邊之略可
為朕充吐蕃使也處訥拜謝既而以不練邊事固辭上
又令中書侍郎趙彥昭充使彥昭以既充外使恐失其

權寵殊不悅司農卿趙履溫私謂之曰公國之宰輔而為一介之使不亦鄙乎彥昭曰然計將安出履溫因陰託安樂公主密奏留之於是以左衛大將軍楊矩使焉其月帝幸始平縣以送公主設帳殿於百項泊側引王公宰相及吐蕃使入宴中坐酒闌命吐蕃使進前諭以公主孩幼割慈遠嫁之旨上悲泣歔歔久之因命從臣賦詩餞別曲赦始平縣大辟罪已下百姓給復一年改始平縣為金城縣又改其地為鳳池鄉愴別里公主既

至吐蕃別築一城以居之睿宗即位攝監察御史李知古上言姚州諸蠻先屬吐蕃請發兵擊之遂令知古徵劔南兵募往經略之蠻首傍名乃引吐蕃攻知古殺之仍斷其屍以祭天時張玄表為安西都護又與吐蕃比境互相攻掠吐蕃內雖怨怒外敦和好時楊矩為鄯州都督吐蕃遣使厚遺之因請河西九曲之地以為金城公主湯沐之所矩遂奏與之吐蕃既得九曲其地肥良堪頓兵畜牧又與唐境接近自是復叛始率兵入寇開

元二年秋吐蕃大將蚩達馬乞力徐等率衆十餘萬寇臨洮軍又進寇蘭渭等州掠監牧羊馬而去楊矩悔懼飲藥而死玄宗令攝左羽林將軍薛訥及太僕少卿王晙率兵邀擊之仍下詔將大舉親征召募將士克期進發俄而晙等與賊相遇於渭源之武階驛前軍王海賓力戰死之晙等率兵而進大破吐蕃之衆殺數萬人盡收得所掠羊馬賊餘黨奔北相枕藉而死洮水為之不流上遂罷親征命紫微舍人倪若水往按軍實仍弔祭

王海賓而還吐蕃遣其大臣宗俄因子至洮河祭其死
亡之士仍款塞請和上不許之自是連年犯邊郭知運
王君奭相次為河西節度使以捍之吐蕃既自恃兵強
每通表疏求敵國之禮言詞悖慢上甚怒之及封禪禮
畢中書令張說奏言吐蕃醜逆誠負萬誅然又事征討
實為勞弊且十數年甘涼河鄯徵發不息縱令屢勝亦
不能補聞其悔過請和惟陛下遣使許其稽顙內屬以
息邊境則蒼生幸甚上曰待吾與王君奭壽之說出謂

源乾曜曰君奭勇而無謀常思僥倖兩國和好何以為
功若入陳謀則吾計不遂矣尋而君奭入朝奏事遂請
率兵深入以討之十五年正月君奭率兵破吐蕃於青
海之西虜其輜重及羊馬而還先是吐蕃大將悉諾邏
率衆入攻大斗谷又移攻甘州焚燒市里君奭畏其鋒
不敢出戰會大雪賊凍死者甚衆遂取積石軍西路而
還君奭先令人潛入賊境於其歸路燒草悉諾邏軍還
至大非山將士息甲牧馬而野草皆盡馬死過半君奭

與秦州都督張景順等率衆襲其後入至青海之西時
海水冰合將士並乘冰而渡會悉諾邏已渡大非川輜
重及疲兵尚在青海之側君奭縱兵俘之而還其年九
月吐蕃大將悉諾邏恭祿及燭龍莽布支攻陷瓜州城
執刺史田元獻及王君奭之父壽盡取城中軍資及倉
糧仍毀其城而去又進攻玉門軍及常樂縣縣令賈師
順嬰城固守凡八十日賊遂引退俄而王君奭為廻紇
餘黨所殺乃命兵部尚書蕭嵩為河西節度使以建康

軍使左金吾將軍張守珪為瓜州刺史修築州城招輯
百姓令其復業時悉諾邏恭祿威名甚振蕭嵩乃縱反
間於吐蕃云其與中國潛通贊普遂召而誅之明年秋
吐蕃大將悉末朗復率衆攻瓜州守珪出兵擊走之隴
右節度使鄯州都督張忠亮引兵至青海西南渴波谷
與吐蕃接戰大破之俄而積石莫門兩軍兵馬總至與
忠亮合勢追討破其大莫門城生擒千餘人獲馬一千
匹犂牛五百頭器仗衣資甚衆又焚其駱駝橋而還八

月蕭嵩又遣副將杜賓客率弩手四千人與吐蕃戰於祁連城下自辰至暮散而復合賊徒大潰臨戰斬其副將一人賊敗散走投山哭聲四合初上聞吐蕃重來入寇謂侍臣曰吐蕃驕暴恃力而來朕今按地圖審利害親指授將帥破之必矣數日而露布至十七年朔方大總管信安王禕又率兵赴隴右拔其石堡城斬首四百餘級生擒二百餘口遂於石堡城置振武軍仍獻其俘囚於太廟於是吐蕃頻遣使請和忠王友皇甫惟明因

奏事面陳通和之便上曰吐蕃贊普往年嘗與朕書悖慢無禮朕意欲討之何得和也惟明曰開元之初贊普幼稚豈能如此必是在邊軍將務邀一時之功偽作此書激怒陛下兩國既鬪興師動衆因利乘便公行隱盜偽作功狀以希勲爵所損鉅萬何益國家今河西隴右百姓疲竭事皆由此若陛下遣使往視金城公主因與贊普面約通和令其稽顙稱臣永息邊境此永代安人之道也上然其言因令惟明及內侍張元方充使往問

吐蕃惟明元方等至吐蕃既見贊普及公主具宣上意
贊普等欣然請和盡出貞觀已來前後勅書以示惟明
等令其重臣名悉獵隨惟明等入朝上表曰外甥是先
皇帝舅宿親又蒙降金城公主遂和同為一家天下百
姓普皆安樂中間為張玄表李知古等東西兩處先動
兵馬侵抄吐蕃邊將所以互相征討迄至今日遂成豐
隙外甥以先代文成公主今金城公主之故深識尊卑
豈敢失禮又緣年小枉被邊將讒構亂令舅致怪伏

乞垂察追留死將萬足前數度使人入朝皆被邊將不
許所以不敢自奏去冬公主遣使人婁衆失若將狀專
往蒙降使看公主來外甥不勝喜荷護遣諭名悉獵及
副使押衙將軍浪些紇夜悉獵入朝奏取進止兩國事
意悉獵所知外甥蕃中已處分邊將不許抄掠若有漢
人來投便令却送伏望皇帝舅遠察赤心許依舊好長
令百姓快樂如蒙聖恩千年萬歲外甥終不敢先違盟
誓謹奉金胡瓶一金盤一金碗一馬腦盃一零羊衫段

一謹充微國之禮金城公主又別進金鴨盤盞雜器物等十八年十月名悉獵等至京師上御宣政殿列羽林仗以見之悉獵頗曉書記先曾迎金城公主至長安當時朝廷皆稱其才辯及是上引入內宴與語甚禮之賜紫袍金帶及魚袋并時服繒綵銀盤胡瓶仍於別館供擬甚厚悉獵受袍帶器物而却進魚袋辭曰本國無此章服不敢當殊異之賞上嘉而許之詔御史大夫崔琳充使報聘仍於赤嶺各豎分界之碑約以更不相侵時

吐蕃使奏云公主請毛詩禮記左傳文選各一部制令
祕書省寫與之正字于休烈上疏請曰臣聞戎狄國之
寇也經籍國之典也戎之生心不可以無備典有恒制
不可以假人傳曰裔不謀夏夷不亂華所以格其非心
在乎有備無患昔東平王入朝求史記諸子漢帝不與
蓋以史記多兵謀諸子雜詭術夫以東平漢之懿戚尚
不欲示征戰之書今西戎國之寇讐豈可貽經典之事
且臣聞吐蕃之性慄悍果決敏情持銳善學不廻若達

於書必能知戰深於詩則知武夫有師干之試深於禮則知月令有廢興之兵深於傳則知用師多詭詐之計深於文則知往來有書檄之制何異借寇兵而資盜糧也臣聞魯秉周禮齊不加兵吳獲乘車楚疲奔命一以守典存國一以喪法危邦可取鑒也且公主下嫁從人遠適異國合慕夷禮返求良書愚臣料之恐非公主本意也慮有奔北之類勸教於中若陛下慮失蕃情以備國信必不得已請去春秋當周德既衰諸侯強盛禮樂

自出戰伐交興情僞於是乎生變詐於是乎起則有以
臣召君之事取威定霸之名若與此書國之患也傳曰
于奚請曲縣鞶纓仲尼云惜也不如多與之邑惟名與
器不可假人狄固貪婪貴貨易土正可錫之錦綺厚以
玉帛何必率從其求以資其智臣忝叨列位職刊祕籍
實痛經典棄在戎夷昧死上聞惟陛下深察疏奏不省
二十一年又制工部尚書李嵩往聘吐蕃每唐使入境
所在盛陳甲兵及騎馬以矜其精銳二十二年遣將軍

李佺於赤嶺與吐蕃分界立碑二十四年正月吐蕃遣使貢方物金銀器玩數百事皆形制奇異上令列於提象門外以示百寮其年吐蕃西擊勃律遣使來告急上使報吐蕃令其罷兵吐蕃不受詔遂攻破勃律國上甚怒之時散騎常侍崔希逸為河西節度使於涼州鎮守時吐蕃與漢樹柵為界置守捉使希逸謂吐蕃將乞力徐曰兩國和好何須守捉妨人耕種請皆罷之以成一家豈不善也乞力徐報曰常侍忠厚必是誠言但恐朝

廷未必皆相信任萬一有人交搆掩吾不備後悔無益也希逸固請之遂發使與乞力徐殺白狗為盟各去守備於是吐蕃畜牧被野俄而希逸僂人孫誨入朝奏事誨欲自邀其功因奏言吐蕃無備若發兵掩之必剋捷上使內給事趙惠琮與孫誨馳往觀察事宜惠琮等至涼州遂矯詔令希逸掩襲之希逸不得已而從之大破吐蕃於青海之上殺獲甚衆乞力徐輕身遁逸惠琮孫誨皆加厚賞吐蕃自是復絕朝貢希逸以失信怏怏在

軍不得志俄遷為河南尹行至京師與趙惠琮俱見白
狗為祟相次而死孫誨亦以罪被戮詔以岐州刺史蕭
昊為戶部侍郎判涼州事代希逸為河西節度使鄯州
都督杜希望為隴右節度使太僕卿王昊為益州長史
劔南節度使分道經略以討吐蕃仍令毀其分界之碑
二十六年四月杜希望率衆攻吐蕃新城拔之以其城
為威武軍發兵一千以鎮之其年七月希望又從鄯州
發兵奪吐蕃河橋於河左築鹽泉城吐蕃將兵三萬人

以拒官軍希望引衆擊破之因於鹽泉城置鎮西軍時
王昊又率劔南兵募攻其安戎城先於安戎城左右築
兩城以為攻拒之所頗兵於蓬婆嶺下運劔南道資糧
以守之其年九月吐蕃悉銳以救安戎城官軍大敗兩
城並為賊所陷昊脫身走免將士已下數萬人及軍糧
資仗等並沒於賊昊坐左遷括州刺史初昊之在軍謬
賞其子錢帛萬計并擅與紫袍等所費鉅萬坐是尋又
重貶為端州高要尉而死二十七年七月吐蕃又寇白

草安人等軍勅臨洮朔方等軍分兵救援時吐蕃於中路屯兵斷臨洮軍之路白水軍守捉使高東于拒守連旬俄而賊退蕭昊遣偏將掩其後擊破之王昊既敗之後詔以華州刺史張宥為益州長史劔南防禦使主客貲外郎章仇兼瓊為益州司馬防禦副使宥既文吏素無攻戰之策兼瓊遂專其戎事俄而兼瓊入奏盛陳攻取安戎之策上甚悅徙張宥為光祿卿拔兼瓊令知益州長史事代張宥節度仍為之親畫取城之計二十八

年春兼瓊密與安戎城中吐蕃翟都局及維州別駕董承宴等通謀都局等遂翻城歸款因引官軍入城盡殺吐蕃將士使監察御史許遠率兵鎮守上聞之甚悅中書令李林甫等上表曰伏以吐蕃此城正當衝要憑險自固恃以窺邊積年已來蟻聚為患縱有百萬之衆難以施功陛下親紆祕策不興師旅頃令中使李恩敬曉喻羗族莫不懷恩翻然改圖自相謀陷神算運於不測睿略通於未然累載逋誅一朝蕩滅又臣等今日奏事

陛下從容問臣等曰卿等但看四夷不久當漸摧喪德音纔降遽聞戎捷則知聖與天合應如響至前古已來所未有也請宣示百寮編諸史策手制答曰此城儀鳳年中羌引吐蕃遂被固守歲月既久攻伐亦多其地險阻非力所制朝廷羣議不合取之朕以小蕃無知事須處置授以奇計所以行之獲彼戎心歸我城守有足為慰也其年十月吐蕃又引衆寇安戎城及維州章仇兼瓊遣裨將率衆禦之仍發關中彊騎以救援焉時屬凝

寒賊久之自引退詔改安戎城為平戎城二十九年春
金城公主薨吐蕃遣使來告哀仍請和上不許之使到
數月後始為公主舉哀於光順門外輟朝三日六月吐
蕃四十萬攻承風堡至河源軍西入長寧橋至安仁軍
渾崖峰騎將盛希液以衆五千攻而破之十二月吐蕃
又襲石堡城節度使蓋嘉運不能守玄宗憤之天寶初
令皇甫惟明王忠嗣為隴右節度皆不能克七載以哥
舒翰為隴右節度使攻而拔之改石堡城為神武軍天

寶十四載贊普乞黎蘇籠獵贊死大臣立其子婆悉籠
獵贊為主復為贊普玄宗遣京兆少尹崔光遠兼御史
中丞持節賁國信冊命弔祭之及還而安祿山已竊據
洛陽以河隴兵募令哥舒翰為將屯潼關昔秦以隴山
已西為隴西郡漢懷匈奴於河右置姑臧張掖酒泉伊
吾等郡又於磧外置西域都護控引胡國又分隴西為
金城西平等郡襍以氐羌居之歷代喪亂不為賢豪所
據則為達夷侵廢迨千年矣武德初薛仁果奄有隴上

之地至於河虜李數盡有涼州之城通於磧外貞觀中
李靖破吐谷渾侯君集平高昌阿史那社爾開西域置
四鎮前王之所未伏盡為臣妾秦漢之封域得議其土
境耶於是歲調山東丁男為戍卒繒帛為軍資有屯田
以資糗糧牧使以餽羊馬大軍萬人小軍千人烽戍邏
卒萬里相繼以却於強敵隴右鄯州為節度河西涼州
為節度安西北庭亦置節度關內則於靈州置朔方節
度又有受降城單于都護庭為之藩衛及潼關失守河

洛阻兵於是盡徵河隴朔方之將鎮兵入靖國難謂之
行營曩時軍營邊州無備預矣乾元之後吐蕃乘我間
隙日蹙邊城或為虜掠傷殺或轉死溝壑數年之後鳳
翔之西邠州之北盡蕃戎之境堙沒者數十州肅宗元
年建寅月甲辰吐蕃遣使來朝請和勅宰相郭子儀蕭
華張遵慶等於中書設宴將詣光宅寺為盟誓取三牲
血歃之無向佛寺之事請明日須於鴻臚寺歃血以申
蕃戎之禮從之寶應元年六月吐蕃使燭番莽耳等二

人貢方物入朝乃於延英殿引見勞賜各有差而劍南
西山又與吐蕃氏羌隣接武德已來開置州縣立軍防
即漢之笮路乾元之後亦陷於吐蕃寶應二年三月遣
左散騎常侍兼御史大夫李之芳左庶子兼御史中丞
崔倫使於吐蕃至其境而留之廣德元年九月吐蕃寇
陷涇州十月寇邠州又陷奉天縣遣中書令郭子儀西
禦吐蕃以吐谷渾党項羌之衆二十餘萬自龍光度而
東郭子儀退軍車駕幸陝州京師失守降將高暉引吐

蕃入上都城與吐蕃大將馬重英等立故邠王男廣武王承宏為帝立年號大赦署置官員尋以司封崔瓌等為相郭子儀退軍南保商州吐蕃居城十五日退官軍收上都以郭子儀為留守初車駕東幸衣冠戚里盡南投荆襄及隱竄山谷於是六軍將士持兵剽劫所在阻絕郭子儀領部曲數百人及其妻子僕從南入牛心谷駝馬車牛數百兩子儀遲留未知所適行軍判官中書舍人王延昌監察御史李萼謂子儀曰令公身為元帥

主上蒙塵於外家國之事一至於此今吐蕃之勢日逼
豈可懷安於谷中何不南趨商州漸赴行在子儀遽從
之延昌曰吐蕃知令公南行必分兵來逼若當大路事
即危矣不如取玉山路而去出其不意子儀又從之延
昌與李萼皆從子儀子儀之隊千餘人山路狹隘連延
百餘里人不得馳延昌與萼恐狹徑被追前後不相救
至倒迴口遂與子儀別行踰絕澗登七盤趨於商州先
是六軍將張知節與麾下數百人自城奔於商州大掠

避難朝官士庶及居人資財鞍馬已有日矣延昌與萼
既至說知節曰將軍身掌禁兵軍敗而不赴行在又忍
其下虜掠何所歸乎今郭令公元帥也已欲至洛南將
軍若整頓士卒喻以禍福請令公來撫之以圖收長安
此則將軍非常之功也知節大悅其時諸軍將臧希讓
高昇彭體盈李惟詵等數人各有部曲率其數十騎相
次而至又從其計皆相率為軍約不侵暴延昌留於軍
中主約萼以數騎往迎子儀去洛南十餘里及之遂與

子儀廻至商州諸將大喜皆遵其約束吐蕃將入京師也前光祿卿殷仲卿逃難而出鞍馬衣服盡為土賊所掠仲卿至藍田糾合散兵及諸驍勇願從者百餘人南保藍田以拒吐蕃其衆漸振至於千人子儀既至商州未知仲卿之舉募人往探賊勢羽林將軍長孫全緒請行以二百騎隸之又令太子賓客第五琦攝京兆尹同收長安全緒至韓公堆晝則擊鼓廣張旗幟夜則多燃火以疑吐蕃仲卿探其官軍其勢益壯遂相為表裏以

狀聞於子儀仲卿二百餘騎遊奕直渡漚水吐蕃懼問
百姓百姓皆給之曰郭令公自商州領衆却收長安大
軍不知其數賊以為然遂抽軍而還餘衆尚在城軍將
王撫及御史大夫王仲昇頓兵自苑中入椎鼓大呼仲
卿之師又入城吐蕃皆奔走乃收上都郭子儀垂之鼓
行入長安人心乃安吐蕃退至鳳翔節度孫志直閉門
拒之吐蕃圍守數日會鎮西節度兼御史中丞馬璘領
精騎千餘自河西救楊志烈廼引兵入城遲明單騎持

滿直衝賊衆左右願從者百餘騎璘奮擊大呼賊徒披靡無敢當者賊疲而歸賊衆恃其驍勇翌日又逼城請戰璘被甲開懸門賊乃抽退皆曰此將不惜死不可當且避之又復居原會成渭之地十二月乘輿還上都二年五月放李之芳還九月叛將僕射大寧郡王僕固懷恩自靈武遣其黨范志誠任敷等引吐蕃吐谷渾之衆來犯王畿十月懷恩之衆至邠州挑戰節度白孝德及副元帥先鋒郭鋒嬰城拒之以挫其鋒賊衆遂逼奉天

縣西二十里為營郭子儀屯於奉天又按軍不戰郭鋒
於邠州西三十里令精騎二百五十人步卒五十人斫
懷恩營破五千衆斬首千餘級生擒八十五人降其大
將四人馬五百匹十一月僕固懷恩引吐蕃之衆退廣
德二年河西節度楊志烈被圍守數年以孤城無援乃
跳身西投甘州涼州又陷於寇永泰元年三月吐蕃請
和遣宰相元載杜鴻漸等於興唐寺與之盟而罷秋九
月僕固懷恩誘吐蕃廻紇之衆南犯王畿吐蕃大將尚

結息贊磨尚息東贊尚野息及馬重英率二十萬衆至
奉天界邠州節度使白孝德不能禦京城戒嚴先是朔
方先鋒兵馬使渾日進孫守亮屯軍於奉天以拒之於
是詔追副元帥郭子儀於河中府領衆赴援屯於涇陽
諸將各屯守要害初吐蕃列營奉天渾日進單騎衝之
驍騎二百人繼進衝突其營左右擊刺賊徒驚駭無不
應弦而斃日進挾一蕃將躍馬而歸蕃將奮身失其撒
飯一日進之衆無中鋒鏑者軍中望而益振明日吐蕃

悉衆圍之日進命拋車夾石投之雜以弓弩賊死傷衆數日歛軍回營尋又日進夜斫賊營於梁母神下殺千餘人生擒五百人獲駝馬器械上又下詔親征括朝官馬京城置團練鎮西節度馬璘遇吐蕃遊奕四百餘人於武功東原使五十人擊而盡殺之無噍類自十七日至二十五日晚際始止議者以為天助吐蕃移營於醴泉縣九嵎山北因攻掠醴泉京城大駭人皆空室大戶鑿竇以出逆黨任數以兵五千餘人犯白水縣渾日進

露布而至叱於奉天馬嵬店今月十九日已後至二十
五日已前交戰二百餘陣破吐蕃一萬餘衆斬首五千
級生擒一百六十人馬一千二百四十二匹馳一百一
十五頭器械幡旗共三萬餘事朝官震懼家口迴避者
十室八九禁之不止自前年吐蕃犯王畿後於中渭橋
鄠豐城以營兵至是功畢吐蕃退至永壽北遇迴紇之
衆雖聞懷恩死皆悖其衆相誘而奔復來寇至奉天兩
蕃猜貳爭長別為營壘吐蕃遊奕至黑底吐蕃又至馬

嵬店因縱火焚居人廬舍而退廻紇三千騎詣涇陽降
款請擊吐蕃為效子儀許之於是朔方先鋒兵馬使開
府南陽郡王白元光與廻紇合於涇陽靈臺縣東五十
里攻破吐蕃斬首及生擒獲駝馬牛羊甚衆上停親征
京師解嚴宰臣上表稱賀

舊唐書卷一百九十六上

舊唐書卷一百九十六上考證

吐蕃傳上遂復親征○

臣酉

按新書作罷親征復字當

是罷字之訛今改正

失其撒飯一○疑有脫誤

舊唐書卷一百九十六上